

## **LOKAL FORSKRIFT OM FEIING OG TILSYN MED FYRINGSANLEGG OG OM REGULERING AV FEIEGEBYR I VANYLVEN KOMMUNE**

Fastsett av Vanylven kommunestyre i sak nr. xxx/xxx den xx.xx.2021 i medhald av lov av 14. juni 2002 nr. 20 om vern mot brann, eksplosjon og ulykker med farleg stoff og brannvesenet sine redningsoppgåver (brann- og eksplosjonsvernlova), og forskrift av 17. desember 2015 om brannførebygging.

### **§ 1 Føremål**

Forskrifta har som føremål å regulere gjennomføring av feiing og tilsyn av fyringsanlegg, slik at sannsynet for at brann skal oppstå i fyringsanlegg, vert redusert så mykje som mogleg.

Forskrifta skal regulere gebyrordninga for feiing og tilsyn til kommunen, samt tilleggstenester innan brannførebygging.

### **§ 2 Virkeområde**

Den lokale forskrifta gjeld feiing og tilsyn av alle fyringsanlegg i brannobjekt i Vanylven kommune.

### **§ 3 Definisjonar**

**§ 3-1 Brannobjekt:** bustadar, fritidsbustadar, verksemd, konstruksjonar, anlegg m.m. der brann kan oppstå og true liv, helse og materielle verdiar.

**§ 3-2 Brukar:** den som i eigenskap av eigar, eller i høve avtale med eigar har bruksrett og nyttar seg av denne retten.

**§ 3-3 Eigar:** den som har grunnboksheimel til eit brannobjekt.

**§ 3-4 Feiing:** reingjering av røykkanalar og uttak av sot.

**§ 3-5 Fyringsanlegg:** omn, sentralvarmekjele eller varmluftkjele, der varme skal verte produsert ved forbrenning av fast, flytande eller gassformig brensel, inklusiv røykkanal og matesystem for brensel.

**§ 3-6 Matesystem:** anlegg for tilførsel av fast eller flytande brensel.

**§ 3-7 Røykkanal:** kanal for transport av røykgassar til friluft, røykrør og skorstein.

**§ 3-8 Skorstein:** vertikal del av fyringsanlegget, og kan innehalde fleire røykkanalar.

**§ 3-9 Tilsyn:** kontroll med at fyringsanlegget er intakt, fungerer som føresett og er tilfredsstillande sikra mot brann og anna skade. Feiar/tilsynsperson kan også få oppgåver som å kontrollere at det i brannobjektet er deteksjon (røykvarslar), sløkkeutstyr og tilfredsstillande moglegheit for rømning ved brann.

#### **§ 4 Hyppigheit for feiing**

Feiing skal verte utført så ofte som naudsynt for å hindre brann eller andre skadar. I utgangspunktet skal det enkelte fyringsanlegget verte vurdert med omsyn til kor hyppig det er naudsynt å feie. Brannsjefen bestemmer kor ofte feiing skal gjennomførast, på grunnlag av erfaring frå tidlegare gjennomført feiing, tilstand til fyringsanlegget, omfang og art. Brannsjefen set på bakgrunn av dette opp ein rullerande plan for gjennomføring av lovpålagt feiing og tilsyn.

#### **§ 4-1 Bustader**

Brannsjefen bestemmer kor ofte feiing skal verte gjennomført, basert på tilstand til fyringsanlegget på eigedommen, omfang og art. Feiinga skal verte utført minst kvart sjette år.

#### **§ 4-2 Fritidsbustader og hytter**

Brannsjefen bestemmer kor ofte feiing skal verte gjennomført, basert på tilstand til fyringsanlegget på eigedommen, omfang og art.

#### **§ 5 Hyppigheit for tilsyn**

Tilsyn med fyringsanlegg skal verte utført minst ein gong per sjette år. Eigar av fritidsbustader og hytter har i hovudsak ansvar for å tilkalle feiaren for gjennomføring av tilsyn. Kommunen skal utføre tilsyn i fyringsanlegg i fritidsbustader og hytter etter plan utarbeidd av brannsjefen.

#### **§ 6 Varsling**

Eigar eller representant for eigar av fyringsanlegg skal varslast skriftleg eller elektronisk med dato for gjennomføring av feiing eller tilsyn, og kan verte pålagt å varsle andre brukarar av vedkomande bygg.

Feiing vert varsla seinast 1 dag før, slik at eigar eller representant for eigar kan legge forholda til rette for at feiing kan verte gjennomført.

Tilsyn skal verte varsla til eigar eller den som representerer eigar med dato seinast 3 dagar før, slik at eigar eller representanten får tid til å førebu seg på å vere til stades under tilsynet.

#### **§ 7 Feie- og tilsynsgebyr**

Gebyret vert fastsett av kommunestyret. Årleg gebyr dekker drift av feiarvesenet i eit år, blant anna gjennomføring av feiing og tilsyn med fyringsanlegg. Gebyret vert sett likt for kvar husstand/eigedom/seksjon. Eigedomar med fleire røykløp får eit tilleggsgebyr for kvart ekstra røykløp. Det skal vere gebyr for alle bustadar/bygg som har ein eller fleire fast tilknytte eldstadar, uavhengig av regelmessig bruk eller ikkje.

For bustadar/bygg som har gassfyrte fyringsanlegg, skal det vere eit redusert gebyr som dekker tilsyn. Gebyret vert sett likt for kvar bustad/bygg. Gebyrplikta er ikkje knytt til tidspunktet for når den enkelte feiinga eller tilsynet er gjennomført, men gjeld for heile feieperioden, uansett når i feieperioden feiinga finn stad.

Gebyr kan krevjast inn sjølv om feiing og tilsyn ikkje er utført i følgjande tilfelle:

- Feiaren finn ved inspeksjon av røykkanalar at feiing ikkje er naudsynt
- Feiaren finn etter at det er varsla feiing eller tilsyn at han/ho ikkje får tilfredsstillande tilgang til fyringsanlegget

Kommunen har etablert ordning med periodevis innkrevjing av omsyn til rasjonelt system, t.d. årleg eller terminvise betalningar og at lovbestemt feiing vert utført etter ein rullerande plan.

### **§ 8 Gebyrfritak**

Kommunen kan etter søknad gjev fritak frå å betale gebyr i følgjande tilfelle:

1. Bustaden har ikkje installert eldstad
2. Fyringsanlegget er fråkopla, og skorsteinen er blenda.

Før fritak vert gjeve, skal feiar ha ført tilsyn med at fråkoplinga av fyringsanlegg og blending av skorstein er utført tilfredsstillande.

Huseigar plikter å melde frå til kommunen dersom fyringsanlegg/eldestad vert installert eller vesentleg endra, vert tilkopla igjen eller blending av skorstein skal fjernast. Om huseigar/ brukar let vere å melde installasjon/tilkopling av eldstad/fyringsanlegg eller fjerning av blending, kan kommunen krevje feiegebyr etterbetalt frå det tidspunktet fritaket vart gjeve.

### **§ 9 Andre tenester**

Eigar og brukar av fyringsanlegg som ønskjer frivillig feiing eller tilsyn utanom lovpålagt feiing eller tilsyn, fjerning av beksot, filming av røykløp og liknande, må sjølv ta kontakt med feiaren og avtale dette. Dette vert utført mot eige gebyr.

### **§ 10 Plikter hjå byggeigar og brukar**

Det er eigar sitt ansvar å halde fyringsanlegget i orden til ei kvar tid. Eigar skal, etter varsel om feiing, syte for at heile fyringsanlegget er tilgjengeleg for feiing, samt utstyrt og innretta slik at feiing kan verte utført på ein tilfredsstillande måte.

Eigar skal å syte for at eigna stige er lagt fram, tilgjengeleg for feiar, i umiddelbar nærleik av takstige/trinn, som eit signal på at det er klart for feiing. Tilkomst til tak skal vere sikra mot utgliding.

Takstige eller trinn skal vere godkjent. Desse skal vere festa til tak i samsvar med monteringsretteiing.

Der feiing ikkje skjer frå tak, skal eigar/representant syte for at feiaren har tilfredsstillande tilkomst til røykløp.

Eigar/representant skal syte for tilfredsstillande tilkomst til sotluke eller tilsvarande egna innretning for sottuttak.

### **§ 11 Plikter hjå feiaren**

Feiinga skal verte utført på ein fagleg tilfredsstillande måte med minst mogleg ulempe for bebuarane. Etter avslutta feiing skal feiaren syte for at sot vert fjerna, enten av feiaren sjølv eller av byggeigar/brukar, og frakta til eigna stad.

Feiaren skal under feiing og tilsyn vurdere tilhøve ved fyringsanlegget som kan ha følgje for brannsikkerheita eller tilkomsten. Ved avvik som ikkje vert retta på staden, skal feiaren gje skriftleg tilbakemelding til byggeigaren eller representant for eigaren om tilhøvet, med frist for retting eller tilbakemelding om når retting vert utført. Dersom rettinga ikkje vert gjennomført, skal tilsynsmyndet gjev pålegg.

### **§ 12 Handheving og sanksjonar**

Lokalt tilsyn, handheving og sanksjonar skal gjennomførast i samsvar med forskrift av 17. desember 2015 nr. 1710 om brannforebygging §§ 6 og 17, samt heimlar i brann- og eksplosjonsvernlova.

### **§ 13 Klage**

Vedtak gjort av lokalt tilsynsmynde i medhald av denne forskrifta kan påklagast etter brann- og eksplosjonsvernlova § 41, andre ledd. Klagen skal framsetjast skriftleg til Vanylven kommune ved brannsjefen. Sakshandsaminga ved klager følgjer avgjerd gjeven i eller i medhald av brann- og eksplosjonsvernlova, samt lov om sakshandsaming i forvaltningssakar (forvaltningslova) og reglement for delegering av mynde i Vanylven kommune.

### **§ 14 Forskrifta trer i kraft**

Forskrifta trer i kraft 01.07.2021.